



«Nus avain atgnamain en maun in brav puschel clavs per avrir las serradiras – suenter corona.»

FOTO TAKACSI75 CC BY-SA 2.0

In puschel clavs per ina nova normalitad

In punct da vista sin l'entschatta da l'onn 2021

DAVID TRUTTMANN/FMR

Senza vulair dramatisar – però nus vulessan puspè enavos nosa vita d'avant! Nossa vita pre-coronala. Nus vulain enavos noss mintgadi normal cun tut sias ingredienzas, las tschertezzas, libertads, necessitads e commoditads. Nus vulain star da cumpagnia, esser damain preoccupads pervi da la sanadad, ans embratschar, ir en ustarias, stizuns e kinos, giudair concerts e teaters, star a plaz cun vischins, ans reunir, rir e chantar. La glista è lunga! Èsi però gia memia giagliard dad insumma exprimer tals giavischs u propiests?

Pelvair, la decada 2020–2030 ha entschet cun ina cesura, cun «ina enturn las ureglias». Be schon en il Grischun hai dà il 2020 var 140 mortoris pervi dal coronavirus. Quants ch'i fissan stads senza mascherinas e distanza sociala – quai na vulain nus gnanc studegiar! Perfin il minister da sanadad dal Grischun, il cusseglier governativ *Peter Peyer*, ha discurrì la fin da l'onn en ina conferenza da medias da «la pli gronda crisa globala dapi la Segunda Guerra mundiala». Ina crisa economica e sociala èsi senza dubi, però da cumparegliar cun ina situaziun da guerra è stravagà, perquai che las curunas en las stizuns èn memia plainas cun acziuns da vins, tschigulatta e filets.

Ettutina, igl è ina crisa enorma e nus ans giavischain – analog a la columna da *Fadrina Hofmann* en questa gasetta (pagina 12) – ina via or da quella crisa. Sco ella scri-

va: Nus vulain puspè pudair «viver». E quai tuna deplorablain per il mument bunamain in pau egocentric e prepotent da bramar enavos quai, il mintgadi d'avant, la vita normala. Perquai che probabel èsi in giavisch illusoric. L'epoca post-coronala – n'emporta betg cura che quella entschaiva – vegn ad esser autra che nosa vita d'avant. I vegn a dar in'otra «vita normala». Ina nova normalitad. Perquai che la normalitad dad ier na turna betg pli. Quella da damain è autra.

Nus stuain numnadain vegnir a tapin per in brav temp cun distanzas adequatas, cun mesiras d'igiene, cun novas furmas da lavur, cun autras furmas d'art e cultura, cun damain mobilitad e perfin cun autras modas d'ans salidar. I dat experts che discurren da divers mais e gea, perfin dad onns. I vegn a cuzzar. Ed i vegn ad esser normal.

Actualmain essan nus però anc tranter ils munds. En il provisorium. Nus discurren dal «temp suenter corona». Nus schain: «I turna schon.» U nus schain: «Cura che tut è passà, alura faschain nus puspè quai e tschai.» – Ma atgnamain n'avain nus anc betg propi realisà che la porta davos nus è serrada e che nus stuain pir chattar la porta che maina a la «nova normalitad». E surtut: I mancan anc las clavs da quella porta ...

Schegea che nus avain atgnamain en maun in brav puschel clavs per avrir las serradiras.

Nus stuain mo las tscherner cun prudientscha. Intginas clavs che pudessan vegnir en dumonda èn las suandantas:

L'emprima clav: Nus stuain tegnair la dira! I na dat naging'otra pussaivladad. Las expertas ed ils experts da sanadad ed epidemia vegnan circa blaus cun stuair repeter e repeter ch'il virus na vegnia betg a svanir cun las emprimas vaccinaziuns. E ch'i saja da tegnair la dira anc per intgins mais. Cun sustegns statals e solidarics nua ch'i va.

La segunda clav: I dovra solidaritad. Schegea che quai tuna banal ed isà. Ma i dovra solidaritad. In applaus giu da balcun na tanscha betg. Quai è mo ina plashentina platta e simbolica per la gallaria. Solidaritad ha dad esser agid e sustegn concret. En francs e raps. Cun lavur concreta. Cun desister a favur dal proxim. Sche nus avain anc gi temp e raps avunda quest Nadal per cumprar novs skis da passlung u per regalar ina tastga da Gucci, alura avain nus anc potenzial «solidaric» vers ensi. Vul dir – renunziar tar sasez a favur da tuttas e tuts.

La terza clav: I dovra umilitad. Umilitad envers la vita e sias pussaivladads apparentamain infinitas. La vita n'è betg (e na duai betg esser) ina carta da menu, nua ch'ins po piclar ora tut quai ch'ins vul e sto avair vis e fatg. La vita na daventa betg pli ritga cun ir tras il mund cun ina checklist e cumprovar quella «vita vivida» cun foto-

grafias sin Instagram. La vita è plitost mo in sulet menu che sa lascia giudair, adattar, transformar uschè bain sco i va. U sco in commentader ha scrit quests dis en la NZZ: il virus n'era betg previs en noss program da progress e quai en in mument, nua che la societad na sa betg pli desister. Gia mo restricziuns transitoricas vegnan resentidas sco intervenziuns dramaticas. U cun auters plects: Era desister po esser ina part dal menu.

La quarta clav: I dovra dumondas. Bleras dumondas. En ina columna da la FMR sin la fin da l'onn ha la schurnalista *Anna Serrarda Campell* fatg in'observaziun precisa. Ella scriva che l'onn 2020 saja stà l'onn da las opiniuns proclamadas cun tutta vehemenza, per part era sa basond sin mesas vardads. Mancà han ad Anna Serrarda Campell las dumondas. Ed ella ha raschun. Nus stuain far dumondas envers noss cumportament, metter en dumonda nossas opiniuns e forsa era reverder quella. Quai vala en la discussiun per mesiras encunter corona e per vaccins. Ma i vala era per discussiuns pli banal-regionalas: p.ex. rumantsch grischun u lufs u la responsabladad da concerns. Da cumbatter opiniun encunter opiniun è pauc da bun. Nus stuain tschentar dumondas e dar ensemen las respotas.

Nus vulain tuts enavos ina vita «normala». Nus vulain chattar la via or dal provisorium. Per fortuna avain nus en maun in flot puschel clavs.